



KERATAN AKHBAR DAN MEDIA ONLINE UNTUK MAKLUMAN :

**Y.B. MENTERI
Y.B. TIMBALAN MENTERI
Y.BHG. KSU
Y.BHG. TKSU (PDN)
Y.BHG. TKSU (PUP)
SETIAUSAHA AKHBAR**

9 DISEMBER 2021 (KHAMIS)



KERATAN AKHBAR DAN MEDIA ONLINE (KPDNHEP)

9 DISEMBER 2021 (KHAMIS)

Tambah barang, tempoh SHMKM

Oleh **ALYA AFIAQH
ACHMAD TARMIZI**

utusannews@mediamula.com.my

PETALING JAYA: Harga dan barangan yang termasuk dalam senarai Skim Harga Maksimum Keluarga Malaysia (SHMKM) perlu ditambah manakala tempoh pelaksanaannya perlu dipanjangkan agar ia tidak menjadi penyelesaian sementara sahaja.

Presiden Lembaga Perlindungan dan Kebajikan Pengguna Malaysia (LPKPM), Dr. Lee Nan Sang berkata, barangan seperti minyak masak bukan peket, daging termasuk daging kambing, ikan kembung, ubi kentang, bihun, ikan sardin dalam tin, bawang besar, bawang merah dan bawang putih perlu dimasukkan dalam senarai.

"Ini kerana ia merupakan bahan makanan atau bahan masakan asas yang sentiasa digunakan," katanya ketika dihubungi *Utusan Malaysia*.

Beliau berkata, skim harga tersebut perlu dipanjangkan sehingga hujung bulan Februari

tahun depan kerana tiga perayaan utama bakal tiba pada Disember dan Januari depan.

"Perbelanjaan keluarga pasti akan meningkat. Jika dipanjangkan sedikit, langkah itu akan dapat meringankan beban rakyat terutama golongan B40 dan M40.

"SHMKM ini perlu dilaksanakan untuk satu tempoh yang lebih panjang seperti tiga atau enam bulan kerana jika hanya tiga minggu sahaja, efektif skim tidak begitu nyata," katanya.

Malah, kata beliau, menjelang Januari nanti, skim itu wajar dapat dilanjutkan kepada barangan lain seperti pakaian sekolah, alat tulis, buku latihan dan yang berkaitan dengan persiapan persekolahan.

Dalam masa yang sama, kata Nan Sang, Kementerian Perdagangan Dalam Negeri dan Hal Ehwal Pengguna (KPDNHEP) perlu membuat pemantauan lebih kerap bagi memastikan peniaga mematuhi SHMKM.

"Saya pasti banyak pertubuhan bukan kerajaan sedia untuk membantu kementerian demi memas-

tikan skim itu memanfaatkan rakyat terbanyak," ujarnya.

Terdahulu, akhbar ini melaporkan, pelaksanaan SHMKM berkuat kuasa semalam sehingga 31 Disember ini, sebagai langkah drastik mengatasi isu kenaikan dan menstabilkan harga barangan keperluan asas pada masa ini.

Sementara itu, Yang Dipertua Persatuan Keselamatan Pengguna Kuala Lumpur (PKPKL), Samudin Mohamad Fauzi berkata, harga barangan terdapat dalam SHMKM tersebut perlu dipertimbangkan semula terutama harga ayam yang masih mahal.

"Kami merasakan harga ini masih tinggi terutamanya harga ayam. Kluatir kerana ada kemungkinan besar harganya akan melambung lagi selepas harga kawalan.

"Seperti mana jika dilihat pola kenaikan harga ayam sejak lima tahun lepas, pernah naik melebihi RM 7.00 kerajaan membuat kawalan kepada RM 5.50 ketika itu dan selepas itu tetap juga naik sampai RM 7.80 sebelum Perintah Kawalan Pergerakan (PKP)," katanya.

Kekal jual ayam RM10 sekilogram tanggung kos

GEORGETOWN: Peniaga di pasar awam negeri ini masih kekal menjual ayam standard sehingga RM10 sekilogram berbanding RM9.30 sekilogram yang ditetapkan sepanjang pelaksanaan Skim Harga Maksimum Keluarga Malaysia (SHMKM) berkuat kuasa kelmarin.

Tinjauan di beberapa pasar awam di daerah Barat Daya dan Timur Laut di sini semalam mendapati berlaku ketidakseragaman harga yang dipamerkan peniaga biarpun skim harga itu sudah dilaksanakan dalam tempoh 24 jam.

Menerusi tinjauan tersebut, hanya segelintir peniaga akur dengan penetapan harga ayam standard RM9.30 sekilogram termasuk mempamerkan tulisan harga secara terang di papan tanda premis.

Seorang peniaga ayam di pasar awam daerah Barat Daya yang hanya mahu dikenali sebagai Fauzan, 44, berkata, dia terpaksa akur dengan arahan penetapan skim harga kawalan yang bersifat sementara itu.

Menurutnya, ini bagi mengelakkan dikenakan kompaun oleh pihak penguatkuasa Kementerian Perdagangan Dalam Negeri dan Hal Ehwal Pengguna (KPDNHEP).

"Rugi tetap rugi kerana kami terpaksa berdepan de-

ngan kenaikan kos, lebih-lebih lagi kos pembelian plastik, gaji harian pekerja, bil air dan elektrik serta sewa tapak.

"Namun, kami terpaksa akur memandangkan skim kawalan ini hanya berlaku dalam tempoh sementara sehingga 31 Disember ini sahaja. Harap tidak dilaksanakan secara berterusan sebab memang kami boleh 'bungkus' (rugi).

"Jika dikira, kami hanya untung 50 sen untuk sekilogram ayam standard dan RM1 sekiranya berat ayam cecah dua kilogram. Itupun bukan hari-hari kami terima berat ayam sebegitu daripada pemborong," katanya di sini, semalam.

Sementara itu, seorang lagi peniaga ayam di pasar yang juga mahu dikenali sebagai Ilyana, 43, memberitahu, dia memilih untuk kekal menjual ayam standard pada harga RM9.50 sekilogram di pasaran ketika ini.

Akuinya, dia berdepan kerugian sekiranya memasarkan ayam standard pada harga yang jauh lebih rendah iaitu RM9.30 sekilogram memandangkan terpaksa menanggung kos pembelian bahan mentah serta membiayai gaji harian tiga pekerjanya.

"Kami menjadi semakin tersepit dengan isu harga ayam standard," katanya.

Skim harga hanya penyelesaian sementara, orang tengah kekal manipulasi harga

Segera hapus orang tengah

Oleh SAFINA RAMLI
utusannews@mediamula.com.my

GEORGETOWN: Langkah kerajaan melaksanakan Skim Harga Maksimum Keluarga Malaysia (SHMKM) untuk menstabilkan harga barangan keperluan semasa dan memastikan keberadaan bekalan di pasaran dilihat hanya mampu menyelesaikan masalah itu untuk tempoh sementara.

Menurut Presiden Persatuan Pengguna Pulau Pinang (CAP), Mohideen Abdul Kader, selagi orang tengah yang memanipulasi harga barangan masih wujud dalam rantai pemasaran, masalah kenaikan harga barangan tidak akan dapat diselesaikan.

Katanya, CAP telah bersuara



MOHIDEEN ABDUL KADER

mengenai isu orang tengah itu sejak 20 tahun lalu, namun, sehingga kini golongan tersebut masih menguasai rantai pemasaran

di negara ini sehingga menyebabkan pengguna terbeban.

"Apa sahaja skim kawalan harga yang dilaksanakan hanya dapat mengatasi masalah kenaikan harga barangan secara sementara.

"Peranan orang tengah dalam rantai pemasaran bekalan makanan perlu segera dihapuskan agar pengguna tidak berterusan menjadi mangsa manipulasi harga yang dimainkan orang tengah ini," katanya di sini semalam.

Kelmarin, Kementerian Perdagangan Dalam Negeri dan Hal Ehwal Pengguna (KPDNHEP) melaksanakan Skim Harga Maksimum Keluarga Malaysia (SHMKM) sebagai langkah menstabilkan harga barangan

keperluan semasa dan memastikan keberadaan bekalan di pasaran.

Pengarah Bahagian Penguat Kuasa KPDNHEP, Azman Adam berkata, skim itu berkuat kuasa mulai semalam hingga 31 Disember ini membabitkan kawalan harga ke atas barangan seperti ayam, telur ayam dan beberapa jenis sayur-sayuran.

Antara barangan terbabit adalah ayam hidup, ayam standard, ayam super, telur ayam gred A, telur ayam gred B, telur ayam gred C dan turut tersenarai kacang panjang, cili merah, tomato, sawi hijau, kubis bulat import (Indonesia dan China tidak termasuk Beijing) dan timun.

Menurut Mohideen, rantai

pemasaran bekalan makanan sepatutnya adalah daripada pengeluar atau penternak terus kepada pengguna, namun, sebaliknya berlaku di negara ini.

"Barangan daripada pengeluar serta penternak akan sampai dahulu kepada orang tengah dan mereka yang akan mengedarkannya kepada peruncit.

"Orang tengah telah menjadi punca harga barangan dimaikan sehingga ada yang meningkat 100 peratus," katanya.

Tambahnya, walaupun isu membabitkan orang tengah itu adalah rumit diselesaikan, namun, kerajaan perlu segera menanganinya agar pemiagaan dapat berjalan secara telus dan tidak membebankan pengguna.

Pantau kenaikan harga barang



PERSPEKTIF
SHAFÉZAH ABDUL WAHAB

“Kita tidak perlukan bangunan tinggi-tinggi. Kita perlukan gaji sedikit tinggi bagi menampung kos sara hidup yang mencajak”.

Ini antara rata-rata respons rakyat di media sosial terhadap pengumuman Menara Merdeka 118 yang secara rasminya menjadi menara kedua tertinggi di dunia selepas Burj Khalifa dan tertinggi di Asia Tenggara pada ketinggian 678.9 meter.

Sungguhpun Menara Merdeka 118 ini bakal memberi manfaat kepada Keluarga Malaysia kerana ia akan menjadi pemangkin baharu ekonomi, namun penerimaan awal sedikit mencalar hati segelintir rakyat. Bukan menolak kemajuan negara, tetapi isu kenaikan harga barangan dan makanan terutamanya ayam, sayur-sayuran dan telur terus menjadi perhatian dan kebimbangan rakyat terutamanya dalam suasana sektor ekonomi baru sahaja dibuka selepas hampir dua tahun terjejas akibat Covid-19.

Kerajaan khususnya Kementerian

Perdagangan Dalam Negeri dan Hal Ehwal Pengguna (KPDNHEP) perlu memandang serius isu kenaikan harga barang ini yang akan menjejaskan proses pemulihan negara jika tidak dikawal. Rakyat baru mula dapat menarik nafas lega selepas sektor ekonomi dibuka semula, namun kini terbeban pula dengan masalah kenaikan harga barang secara mendadak.

Tiada siapa yang menafikan secara keseluruhan bekalan barangan keperluan dalam negara mencukupi dan mampu menampung keperluan dalam negara yang berterusan dan mudah diperolehi. Meskipun dalam cuaca yang tidak menentu di beberapa negeri, bekalan makanan mentah tidak ada yang kurang.

Apabila kerajaan melonggarkan sekatan pergerakan, suasana di pasar, pasar raya atau pasar raya besar cukup meriah. Lantaran itu tiada alasan harga barang dinaikkan disebabkan pengurangan permintaan.

Permintaan

Perubahan harga yang dipengaruhi oleh faktor permintaan dan pasaran secara adil boleh diterima semua pihak. Dengan keredaan pandemik Covid-19, pembukaan semula ekonomi dunia telah meningkatkan permintaan secara mendadak.

Permintaan tinggi turut didorong oleh peningkatan perbelanjaan kerajaan dan kelonggaran polisi monetari secara se-

rentak oleh semua negara dalam menangani kelembapan ekonomi akibat pandemik Covid-19 sejak 2020.

Bagaimanapun, dilema pengguna hari ini terutama golongan B40 dan M40 pertengahan adalah harga barang-barang keperluan harian yang mencanak sejak beberapa bulan ini. Semuanya naik! Itulah kesimpulan yang boleh dibuat.

Susulan aduan kenaikan harga barang, KPDNHEP telah memeriksa premis-premis perniagaan di peringkat peruncit, pemborong dan pengilang.

Tidak logik untuk alasan peniaga menaikkan harga bagi menanggung kerugian disebabkan pembelian merosot. Oleh itu, mengapa harga barang keperluan harian melonjak dengan ketara? Adakah wujud pihak yang mengambil kesempatan sehingga menyebabkan berlaku peningkatan ketara harga runcit bagi keperluan makanan?

Meskipun harga runcit sebahagian besarnya dipengaruhi rantaian bekalan domestik, ia tidak sewajarnya naik pada kadar keterlaluan memandangkan rantaian domestik tidak dipengaruhi input global.

Harga runcit wajar naik tetapi tidak boleh keterlaluan. Harga runcit boleh naik tetapi Margin Runcit-Ladang seharusnya kekal memandangkan rantaian domestik tidak dipengaruhi input global.

Kenaikan harga barang ini jika tidak dipantau dengan teliti oleh KPDNHEP

dikhawatiri akan menjejaskan kehidupan isi rumah berpendapatan kecil dan keluarga yang terjejas akibat pandemik Covid-19.

Jika dahulu dengan mempunyai duit cukup-cukup sahaja boleh beli ikan sardin tin atau ikan bilis, tetapi sekarang harga setin sardin juga meningkat kepada lebih RM7 setin manakala ikan bilis paling murah RM24 sekilo. Senang cerita, RM100 yang dibawa suri rumah ke pasar tidak lagi mampu memenuhi bakul apatah lagi trolie.

Sehubungan itu, inisiatif KPDNHEP melaksanakan Skim Harga Maksimum Keluarga Malaysia (SHMKM) sebagai langkah untuk menstabilkan harga barangan keperluan semasa dalam memastikan keberadaan bekalan di pasaran yang berkuat kuasa 7 hingga 31 Disember ini dilihat sebagai satu langkah positif kerajaan.

KPDNHEP kini bukan sahaja perlu memantau bekalan barangan pengguna mencukupi sebaliknya pastikan peniaga tidak menaikkan harga barangan.

Sebagai salah satu kementerian di bawah kerajaan, KPDNHEP perlu meletakkan kepentingan pengguna mengatasi keuntungan peniaga yang mengambil kesempatan di sebalik kesukaran rakyat.

* Shafezah Abdul Wahab ialah Pensyarah Kanan Fakulti Komunikasi dan Pengajian Media UiTM Cawangan Melaka

*Harga (RM/kg) Sumber: KPDNHEP

	New fuel prices <i>Dec 9 – Dec 15</i>
RON95	RM2.05 (unchanged)
RON97	RM2.99 (-3 sen)
DIESEL	RM2.15 (unchanged)